

\c 6

\r 1 Korintus 6:1-11

\s Nuik: Neneyboy nogo nebut pen.

\v 1 Esang, ayangnang, mianang! Ibe lo pepen go: “Motnang sik sogo sedue temu ey sagui semu go no, dia idi sogo sedue lo neyboy genang sogo so, klong go, nebut rli go gemang. No, blong duo yap, kon kua go sono, ne kua klong go pepen. Ngga, mo piam gemang!

\v 2 Motnang maning kua senong? Kukunan ngge, Ki Wali Iram go Blong duo yap kon kua golo, mea neyboy! Nggano kukunan ngge motnang lo neyboy genang sogo, sogo kalik goso, piam seguay-seguay go, motnang tang sogo ya kua neyboy?

\v 3 Motnang kua senong dali? Wali deguo sedue, motnang lo mea neyboy. Ngga kalik go, imot go wali ba nogo tangeng-tangeng seguay go, imot tang so se neyboy.

\v 4 Nemot-a ngga kalik go, motnang lo nebut-nebut ngganemot dia idi sogo sedue-sedue lo wet genang so, ne i-iti? Ngga kalik go, genam ya kua keng!

\v 5 No, motnang sik sogo sedue klaya duo kunala kalong ey go kua, motnang andua si yap go nebut-nebut uwet genang sogo? Motnang suongsut se tra!

\v 6 Esang! Motnang sik sogo andua-si logo way-way sogo nebut ya kua wet! Nggano, motnang lo way so klong go, Ki Wali Iram no kua keng go sedue no, ne rli klong!

\v 7 Dabui klum! Motnang, nebut sagui way-way so maning sesemu go gemang. Motnang sogo kalik so don kua go kalik, ya kua lemoy? Nggano sedue kabung meno lo, piam so semu go sik sogo, ide lek genang sogo, motnang moy so?

\v 8 No, motnang tang sogo, tap nemudi sogo kua koklong ne! Nggano meno duo nogo, motnang tang sogo piam so gemang mo sesemu. Esang! Ngga motnang blong duo yap go andua-si gemang!

\v 9 Motnang kua senong? Nemudi so kua koklong go sedue kabung, Ki Wali Iram go blong ya kua degut. Motnang suey so se duing! Tap piam golo koklong go, didemu no ta so kokong go, si-kamea duo, sedue, sedue dali ey dabui piam golo kamea kua seni go sesemu go,

\v 10 wom duo, bontui duo, bu so dedrop go, nebut piam goso pepen go,

wamoy mlue so sesemu go, nemotnang naklay, Ki Wali Iram go blong ba
nogo mea kua degut.

\v 11 Motnang sik sogo sedue kabung temu, banim nogo, ngga kalik dali so gemang.
No, motnang go saysuk, bu ulu genang sogo so mo iti,
nggano motnang go kon mo suep. Seni so, motnang, imot go Woy Dem Yesus Klistus
go sui ba no, sedue suey goso mo pu.
Ki Wali Iram go Wime Newet go don logo, ngga mo lemoy.

\p

\r 1 Korintus 6:12-20.

\s Nuik. Sikamea nogo mang king.

\v 12 Ayanang, mianang, motnang lo pen go: “Seni so, (Woy Dem ba nogo)
ngge naklay, genam nogo kagot sogo kua!” No, esang: “Ngganemot naklay,
motnang nogo, seni seguong ey kua!” Nggano, motnang lo pen dali go:
“Ngge naklay genam lo mea semu!” Ngga, seni so!
No, ngganemot go don lo, mot go saysuk dok ey go!”

\v 13 Motnang lo pen dali go: “Ten-dedam, teguan nogo sogo,
teguan, ten dam genang so mo semu.” No, genam lo pu go:
“Ten ey teguan ey, Ki Wali Iram lo mea buin dali.”
Motnang ngge kalik se duing: “Saysuk (Ki Wali Iram lo) sikamea nang so kua semu.
No, Woy Dem wawi genang so mo semu.
Nggano, Woy Dem, saysuk nogo wengkabui gabe!

\v 14 Ki Wali Iram, Woy Dem so nglong go,
Nemot go don ngganemot dali lo, imot mea nglong.

\v 15 Motnang se senong! Motnang go saysuk ngga, Woy Dem go ta-masi gemang!
Ngga kalik go, genam logo, Woy Dem go ta-masi ngganemot,
kamea nang sogo so ya iti? Ngga kalik so ya kua!

\v 16 Motnang maning kua senong? Nando lo, sikamea kabung ey srek go,
nemot go saysuk kabung ngganemot ey klaya goso gemang mo dok.
Ngga Wali Sam Klaut ba no mo pen: “Nemot namon, saysuk klaya so gemang ya lemoy!

\v 17 No, nando Woy Dem ey klaya so mo dok go,
nemot Woy Dem go Waglo ey klaya goso gemang mo lemoy dali.

\v 18 Ngga sogo so, motnang go saysuk kamea sik sogo, ket sono se pling.
Seni so, kon-keba mling temu ngga, dia no semu go, saysuk no kua.
No, kamea ngga, saysuk temoy no sesemu go kon gemang.

\v 19 Motnang se senong! Motnang go saysuk ngga
Wime Newet Klaut lo susuing go yap gabe!

Ngga, motnang no Ki Wali Iram lo iti go.

Ngga tang so, motnang se senong: motnang ngge, motnang tang go kua.

^{v 20} Seni so, motnang ngge, Ki Wali Iram go drang lo mo king.

Motnang sogo drang ngganemot, yam so mo semu.

Ngganemot sogo so, motnang go saysuk lo,

Ki Wali Iram go blong se taling!